

柳宗元


竹居致廬

全唐文

卷之五十九

相宜元

竹居致康



全唐文
卷之六十八
七

欽定全唐文卷五百八十八目錄

柳宗元 二十

唐相國房公德銘之陰

故御史周君碣


國子司業陽城遺愛碣 并序

唐故給事中皇太子侍讀陸文通先生墓表

先侍御史府君神道表

故殿中侍御史柳公墓表

故宏農令柳府君墳前石表辭



亡友故祕書省校書郎獨孤君墓碣

唐故萬年令裴府君墓碣

唐故兵部郎中楊君墓碣

欽定全唐文卷五百八十八

柳宗元 二十

唐相國房公德銘之陰

天子之三公稱公王者之後稱公諸侯之入爲王卿士亦曰公有土封其臣稱之曰公尊其道而師之稱曰公楚之僭凡爲縣者皆曰公古之人通謂年之長老曰公故言三公若周公召公王者之後若宋公爲王卿士若衛武公虢文公鄭桓公其臣稱之則列國皆然師之尊若太公楚之爲縣者若葉公白公年之長老若毛公申培公而大臣罕

能以姓配公者雖近有之然不能著也唐之大臣以姓配公最著者曰房公房公相元宗有勞於蜀人咸服其節相肅宗作訓於岐人咸尊其道惟正直慈愛以成於德用是進退所居而事理辯所去而人哀號理袁人袁人不勝其懷爲文士趙郡李華銘公之德亂故不克立今刺史太原王涯嘉公之道猶在乎人袁人不忘公之道爲之刻石且曰州之南有亭曰需宴亭公之爲也人之思也乃增飾棟宇卽而立焉州人大悅咸會隕涕言曰昔公以周召之德微子之仁有土封以爲卿士道爲三公德爲國師年爲元

老嘗爲縣縣懷其化至於州州濡其澤凡我子孫罔不戴
慕盛德之詞文而不刻更刺史數十莫克興起乃卒歸於
王公王公嘗以機密匡天子於禁中承公之道刺於我邦
由公之理又能尊公之德起遺文以昭前烈則其入爲卿
士三公也孰曰不宜吾懼其去我也遽願書於銘之陰用
永表於邦之良政

故御史周君碣

有唐貞臣汝南周氏諱某字某以諫死葬於某貞元十二
年柳宗元立碣於其墓左在天寶年有以諂諛至相位賢

臣放退公爲御史抗言以白其事得死於墀下史臣書之
公死而佞者始畏公議於虜古之不得其死者衆矣若公
之死志匡王國氣震姦佞動獲其所斯蓋得其死者與公
之德之才洽於傳聞卒以不試而獨申其節猶能奮百代
之上以爲世軌者也若令生於定哀之間則孔子不曰未
見剛者出於秦楚之後則漢祖不曰安得猛士而存不及
興王之用沒不遭聖人之歎誠立志者之所悼也故爲之
銘銘曰

忠爲美道是履諫而死佞者止史之志石以紀爲臣軌兮

國子司業陽城遺愛碣

并序

四年五月皇帝以銀印赤紱卽隱所起陽公爲諫議大夫
後七年廷諍懇至累日不解帝尤嘉異遷爲國子司業旌
直優賢道光師儒又四年九月己巳出拜道州刺史太學
生魯郡李儻廬江何蕃等百六十人投業奔走稽首闕下
叫閤籲天願乞復舊朝廷重更其事如己巳詔翌日會徒
北嚮如初行至延喜門公使追奪其章遮道願罷遂不果
獻生徒嗷嗷顧盼徘徊昔公之來仁風扇揚暴傲革面柔
輒有立聽聞嘉言樂甚鐘鼓瞻仰德宇高逾嵩岱及公當

職施政示人準程良士勇善僞夫去飾情者益勤誕者益
恭沈酗腆酒斥逐郊遂違親三歲罷退鄉黨令未及下乞
歸就養者二十餘人禮順克彰孝弟以興則又講貫經籍
俾達奧義簡習孝秀俾極儒業冠屨裳衣由公而嚴進退
揖讓由公而儀公征甚遐吾黨誰師遂相與咨度署吏布
告諸儒願立貞珉侔高狀明乃訪於學古之士紀公名字
垂憲於後公名城字亢宗家於北平隱於條山惟公端粹
沖和高嶷懿醇道德仁明孝愛友悌薰襲里閭布聞天下
守節貞固患難不能遷其心怡性坦厚榮位不足動其神

爲司諫義震於周行爲司業愛加於生徒宜乎立石俾後
是憲其詞曰

惟茲陽公履道葆醇爰初隱聲覆簣基仁德充而形乃作
諫臣抗志勵義直道是陳帝求師儒貳我成均開朗蒙滯
宣明德教太和潛布元機密照羣生聞禮後學知孝進退
作則動言是倣匪公之軌人用奚蹈麤厲貪凌待公順之
欺僞譎詐待公信之少年申申咸適其宜榎楚廢弛尊嚴
而威公褒其良俾升於堂墮者旣肥榮如袞衣公棄不用
懲咎內訟旣訟於內猶公之誨匪仁孰親匪德孰尊今公

於征孰表儒門生徒上言稽首帝閣謂天蓋高曾莫我聞
青衿涕濡闐街盈衢遠送於南望慕踟躕立石書德用揚
懿則嗚呼斯文遺愛罔極

唐故給事中皇太子侍讀陸文通先生墓表

孔子作春秋千五百年以名爲傳者五家今用其三焉秉
觚牘焦思慮以爲論注疏說者百千人矣攻訐狠怒以詞
氣相擊排冒沒者其爲書處則充棟宇出則汗牛馬或合
而隱或乖而顯後之學者窮老盡氣左視右顧莫得而本
則專其所學以訾其所異黨枯竹護朽骨以至於父子傷

夷君臣詆悖者前世多有之甚矣聖人之難知也有吳郡人陸先生質與其師友天水啖助洎趙匡能知聖人之旨故春秋之言及是而光明使庸人小童皆可積學以入聖人之道傳聖人之教是其德豈不侈大矣哉先生字某旣讀書得制作之本而獲其師友於是合古今散同異聯之以言累之以文蓋講道者二十年書而志之者又十餘年其事大備爲春秋集注十篇辯疑七篇微指二篇明章大中發露公器其道以聖人爲主以堯舜爲的包羅旁魄膠轕下上而不出於正其法以文武爲首以周公爲翼揖讓

升降好惡喜怒而不過乎物既成以授世之聰明之士使陳而明之故其書出焉而先生爲巨儒用是爲天子諍臣尚書郎國子博士給事中皇太子侍讀皆得其道刺二州守人知仁永貞年侍東宮言其所學爲古君臣圖以獻而道達乎上是歲嗣天子踐阼而理尊優師儒先生以疾聞臨問加禮某月日終於京師某月日葬於某郡某里嗚呼先生道之存也以書不及施於政道之行也以言不及覩其理門人世儒是以增慟將葬以先生爲能文聖人之書通於後世遂相與謚曰文通先生後若干祀有學其書者

過其墓哀其道之所由乃作石以表碣

先侍御史府君神道表

嗚呼先君之墓仲父殿中君誌焉孤宗元不敢稱道先德
然而無以昭於外者用敢悉取仲父之所陳而繫其辭刻
茲石表先君諱鎮字某六代祖諱慶後魏侍中平齊公五
代祖諱旦周中書侍郎濟陰公高祖諱楷隋刺濟房蘭廓
四州曾伯祖諱奭字子燕唐中書令曾祖諱子夏徐州長
史祖諱從裕滄州清池令皇考諱察躬湖州德清令世德
廉孝颺於河澍士之稱家風者歸焉先君之道得詩之羣

書之政易之直方大春秋之懲勸以植於內而文於外垂
聲當時天寶末經術高第遇亂奉德清君夫人載家書隱
王屋山間行以求食深處以修業作避暑賦合羣從弟子
姪講春秋左氏易王氏衍衍無倦以忘其憂德清君喜曰
茲謂遯世無悶矣亂有間舉族如吳無以爲食先君獨乘
驢無僮御以出求仁者冀以給食嘗經山澗水卒至流抵
大壑得以無苦被濡塗以行無愠容觀者哀悼而致禮加
焉季王父六合君忤貴臣死於吏舍猶鞠其狀先君改服
徒行逾四千里告於上由是貸其問旣而以爲天子平大

難發大號且致太平人罹兵戎農去耒耜宜以時興太學
勸耦耕作三老五更議耜田書齋沐以獻道不果用授左
衛率府兵曹參軍尚父汾陽王居朔方備禮延望授左金
吾衛倉曹參軍爲節度推官專掌書奏進大理評事以爲
刑法者軍旅之楨幹斥候者邊鄙之視聽不可以不具作
晉文公三罪議守邊論議事確直世不能容表爲晉州錢
事參軍晉之守故將也少文而悍酣嗜殺戮吏莫敢與之
爭先君獨抗以理無辜將死常以身扞笞箠拒不受命守
大怒投几折簣而無以奪焉以爲自下繩上其勢將殆作